

NATIONAAL ARCHIEF 'S-GRAVENHAGE

HANDSCHRIFTEN DERDE AFDELING

TOEGANGSNUMMER 3.22.01.01

INVENTARISNUMMER 247.40

MAGESCHEID TUSSEN DE KINDEREN VAN  
AERT WAUTERSZ. EN JUDT HERMENSDOCHTER  
TE WIJK BIJ DUURSTEDEN

1533

1 CHARTER

BEWERKING DOOR

ANTHONIUS VAN DER TUIJN

TE RHOON

Voor eventuele vragen, opmerkingen en verbeteringen  
([anthoniuvandertuijn@gmail.com](mailto:anthoniuvandertuijn@gmail.com)).

Als u gegevens uit deze bewerking gebruikt voor genealogische of historische doeleinden, dient een verwijzing naar deze bewerking vermeld te worden. Bij gebruikmaking van gegevens uit deze bewerking ten behoeve van publicaties, in welke vorm dan ook, moet een adequate bronvermelding naar deze bewerking worden vermeld.

Wij Guerdt van Coddendoerd licentaet in bejden rechten, Arent Henricxzoen van (Muiere(n)?), Cornelis Hermens zoon ende Jan Noijst doen condit allen den gheenen die desen brieff zullen zijn ofte horen leesen dat wij een vrundelicke maichgescheijde ende dedinghe ghemaict hebben tusschen meester Steven Henrick, Wouter Henrick, Jan Thonis ende Anna Aert Wouterszoons kinderen ende Jan Loiffszoon als voicht van Alidit zijn hujsfrou oick Aerts voirsz. dochter, van alle alzulcke erffenis ende besterffenis heerlick ende eijgen roerende ende onroerende goederen als hoer luijden aengecomen ende aenbestorven zijn van van saliger Aert Wouters zoen haer vader ende Judt Hermens dochter heur moeder nijet daer van vuytgesondert. In den eersten sall meester Steven hebben tot zijnen deel den boemgaerd, gheleegen achter Sint Anthonis cappel bij Wijck. Item daer toe noch elff carolus gulden ende vijff stuver losrhenten ende dair noch vier carolus gulden losrhenten die David van Zuijlen den boedel schuldich was. Item daer toe noch vijftich gulden aen hujsraidt. Ende die vruchten ofte die pacht die naer Palmdach verschenen was ofte verschijnen sall, sall hij oick boeren. Item dair toe sall noch meester Steven hebben eenen tabbert ofte laicken ofte gelt dair voir tot estimatie van ons dedincxluijden ende hier mede sall hij vuyt desen boedel treden ende dair niet meer van hebben indt cleijn noch int groot. Item Jan Loiffs zoon mit Alidit zijn hujsfrou sullen behouden alle alzulcken mede gans ende goederen als Alidit voirscreven van haer vader ende moeder gehadt heeft ende en sall nijet meer vandie voiscr. erffenis ende besterffenis hebben dan acht sulvere cruijsen die hem van stonden aen overgelevert zijn mit voirwairden dat indien Alidit zijn hujsfrou offlivich voorde ende enich van hair voirscreven broeders ofte susteren dair nair offlijvich wairden sonder geboert achter te laten, dat alsdan hair kijnderen staen sullen in hair stede in alle erffenis ende besterffenis als hair deur van aencomen mochte indien zij in levende lijve wair. Item Henrick Aerts zoon voiscr. sall hebben ende behouden dat erff ende heerlick goidt achter beris, genaemt Schuelenborch mi alle zijne toebehoren soe alst daer van (vlek) gelegen is. Des sall hij eens vuytreijcken ende betalen van zijnen goederen die hem toegekomen zijn, Wouter Harmen Jan Thonis ende Annen zijn broes ende susters elcx eens vijftich carolus gulden, belopende te samen derderffhondert carolus gulden. Item noch sall Henrick hebben die acht hondt lants op Noerdervoerde (vlek) die hujsinge mitten hoffstede, gelegen bij die buijtenpoert aenden dijk binnen Wijck. Item vuyt Fije costers hujs staende aen tkerckhoff sestien stovers losrente. Item vuyt Willem van Hollants hujs oick thien stuver losrendt. Item noch vuyt M...dt Screvents hujs sestien stovers erffrendt. Item noch vuyt Willem Gerits zoons hujs twee ende dertich stuver losrendt. Item dair toe noch vier gulden eens vuyter reden goiden des vaders. Item Wouter Aerts zoon sal hebben voir zijn deel ende lotinghe dathujs onder de moelenwerff dair vuyt goede eenen halven gouden gulden. Item noch ses carolus gulden ende achtendetwintich scellinge siaer vuyt Willem die Ridders erff. Item noch een ouden schildt erffrandt gaende vuyt meester Aernt Henricx zoons die meding noemgaert. Item noch drie carolus gulden ende vier stovers gaende vuyt Steven die Weitsen gadt. Item noch Frederick van Hijens hujs acht ende twintich stuver losrent. Item vuyt Peter van Wettens hujs hujs twaelf stuver losrente. Item vuyt Lubbert Stevens zoons hujs sestien stuver losrent. Item vuyt Gerit Knoops hujs eenen gulden losrhent. Item noch een hoerns gulden vuyt Jan van Cuijlenborchs hujs. Ende dair toe sall hij noch hebben voir vuyt den boedel twaleff carolus gulden ende twaleff stovers. Item Harmen Aerts zoon sall hebben voir sijn deel ende is te loot gevallen onder halven mergen lants gelegen up die oude weteringe. Item noch vuyt Marijtghe Hieronijmus hujs vijff carolus gulden ende derthien stuver. Item vuyt Aelbert die visschers hujs thien stuver losrhent. Item vuyt Neel Oloffsz. hujs vier gulden ende seshien stuver losrhent. Item vuyt Steven Oloffs hujs een carolus gulden erffrendt. Item vuyt Cornelis Cruijnen hujs indie Voirderstraet acht ende veertich stuver losrhent. Item vuyt Laurens van Vrougetens hujs derdalve gulden lesrent. Ende dair toe sall hij noch hebben voir vuyten boedel acht carolus gulden ses stuver. Item Jan Aerts zoon sall hebben ende is te loot gevallen voir zijn deel die rendt van Gerrit Jacobs zoon belopende twee ende twintich gulden ende vijff stuver. Item noch twee hondt lants geleege aen Stroebant cappelle vuyten boeder van Neel van Scherpenseel gecoft zijnde. Item van sadelmaickers hujs eenen gouden gulden erffrhent. Item van die stad van Wijck elff stuver losrhent. Item vuyt Jan van Voschhujs bijde Veltpoert acht ende veertich stuver erffrendt. Ende dair toe noch eens vier gulden twee stuver van die rede goiden voir vuyten boedel. Item Thonis Aerts zoon sall hebben voir zijn deel ende is te loot gevallen thien hondt lants bij twerste cruijs. Item noch vier gulden losrhenten tot Eck van meester Eelgis van Treest. Item vuyt Cornelis van Driels landt derdalve gulden. Item vuyt Steven

Robbens huijs tweendedertich stuver jaerlix erffrant. Item vuyt Hannichgen olijslagers huijs sestien stuver. Item vuyt Meus van Haestens huijs bij tcloester vier ende twijntich stuver erffrendt. Item Anna Aerts dochter sal hebben voir hair deel ende lotinge dat geheel huijs dair Aert voirscr. inne te woenen plach, streckende van voeren tot achter aen Truij Roijen huijs ofte schuij. Item noch vuyt Jacop die Witten landt gelegen achter Sinte Anthonis cappel drie loot silvers. Item vuyt Claesken Vreesen huijs ses stuver. Item vuyt Goert die leijdeckers huijs thien stuyvers. Item van Ruijter die besemmaicker huijs vier ende twijntich stuver. Ende dair toe noch aen reede gelde voir vuyten boidel vier gulden sestien stuver. Item die Staten rhenten belopen drie ende dertich philips gulden ende twijntich stuver die sullen heur (clr?) Wouter, Harmen, Jan, Thonis, ende Anna tsamen deijlen ende rhenten dair off comende een ijegelicken (...even) veel off hoeren. Ende hier mede sullen alle dese voirscr. kijnderen gescheijden zijn van alle die onruerlicke goederen ende rhenten als Aert Wauters zoon mit Judt zijn huijsfrou achtergelaten hebben ruerlicke goideren. In den eerste sall Henrick behouden allen den huijsraidt mitten inhouden die inden huijse is ende dair toe sall hij houden ende boeren een jair rhenten van die Staten ende hier voir sall hij betalen alle die schulden die den boedel schuldich is tot desen daghen toe ende dair toe sall hij van datvoirscr. jair rhenten Wauter, Hermen, Jan Thonis ende Anne elck eens twee carolus gulden geven. Item die schulden nair vuytwisinge den boick mit dat wullen saicken ende reedt gelt belopen vier ende twijntich hondert carolus gulden ende sevendedertichstalve stuver vuytgescheijden drie achtelstallige termijnen van den Staten ende die schulden van biscop Philips ende hartouge Henrick dese gelden sullen Henrick, Wauter, Hermen, Jan, Thonis ende Anna te samen deijlen, welverstaende dat Henrick dat laicken behouden sal voir alzulcken prijs als dat gewaerdeert is. Ende voert sall hij dat gereede gelt behouden ende sall alle die schulden inmanen binnen vier jairen ende sall alle jair geven ende betalen van dese vier ende twintich hondert carolus gulden ende twee ende dertichstalve stuver ....rende aen handen van Wouter, Harmen, Jan, Thonis ende Anna ende hier van sall hij oick zijn aenvaert hebben ende wes schulden hij nijet krijgen en kan die sal hij in tleste jair ende aenden lesten termijn corten. Item die drie achterstallige termijnen van die Staten ende die schulden van biscop Philips ende hartouge Henrick tselve daer off coempt sullen dese seskijnderen als Henrick, Wauter, Hermen, Jan, Thoenis ende Anna oick tsamen deijlen. Ende hier mede sullen alle dese voirscreven kijnderen gescheijden zijn van alle erffenis ende besterffenis die hoir aengecomen ende aenbestorven is van vader ende moeder ende elck sall deen up ten anderen vertijen ende in zijn geloette goideren vestigen soe wanneer hem van dese voirscr. kijnderen ofte hoiren erven des vermaint werdt ende ingevall dat hier eenich onderstandt donckerniss ofte twist inne geviel, tselve sall staen tot verclaringe van ons vier de dincxluijden voirscreven ofte den genen die dan te levenden lijve wesen sall. In kennis der wairheijt hebben wij Steven Jan Loiffszoen, Henrick, Wouter, Hermen, Jan, Thonis ende Anna gebeden meijster Guerd van Coddannoerd, Aert Henricszoon, Cornelis Harmens zoon ende Jan Noijst die maichgescheijt met ons te bezegelen. Dat wij Everdt, Aert, Cornelis ende Jan Noijst om beeden van den voirscr. personen geern gedaen hebben. Ende tot meerder vestenis heb ick Jan Loiffszoon dit oick over mij selven ende mede (vlek) ...eerten van mijns huijsfrouwen broeders ende suster mijn segel aen desen brieff gehangen. int jair ons heeren vijftienhondert drie ende dertich op ten derden dach van den april.

Met gave zegels van Guerd van Coddannoerd, Aart Henricxz., Cornelis Harmensz., Jan Noijst en Jan Loijfsz.